

四庫全書

集部

欽定四庫全書

集部

石倉歷代詩選卷三百一
三

詳校官庶吉士臣龍廷槐

侍讀臣孫球覆勘

總校官進士臣朱鈐

校對官中書臣范來宗

謄錄監生臣吳宗秀

欽定四庫全書

石倉歷代詩選卷三百一

明

曹學佺

編

明詩初集二十一

高棟

儲御史光義田家雜興

野老安貧賤力作不辭苦把鋤行晨風南山看禾黍今
秋穀稍登方思廣場圃歸來斄簷下團團聚兒女落日

在西山悠然望孤渚
昨宵天始寒
蟲聲滿籬戶
田家衣食薄
黽勉歲時取
掩關未成眠
東隣響機杼

岑補闕參同諸公登慈恩寺浮圖

香界出塵表
孤標屹崢嶸
直上凌半空
言是羽翼成
迴梯接元氣
磴道盤青冥
雄觀隘川岳
乃覺形神輕
俯視寒渭白
平臨終南青
神州一掌中
雙闕雲端明
窮歷諸磴盡
颯然涼飈生
千峰掛飛雨
秦塞何淒清
早割區中緣
永懷叅道情
今日高興盡
期君謝浮名

劉隨州長卿江中晚釣寄荆南一二相識

楚水東去遠故人離別心登舟望落日岍絕荆門陰晚
櫂向孤嶼收綸度前林天寒大澤暝鳥沒長淮深十載
夢烟波幽期共投簪白鷗故友待向我如招尋渺渺初
月色嗷嗷飛鴻音相思若千里遙寄滄浪吟

與林九龍門夜宿遲明贈別兼寄周一玄

江郭梅已白飛霜肅嚴冬故人惜短景握手龍門東群
壑倏暝色虛亭寒夜空明燈照孤月相對情未終明發

忽惆悵拂衣如飄風長天西北傾三山落雲中中有淡
蕩人孤高含清真三年濶風采百里悲胡秦前日遊遠
方登堂別嚴親出門向西笑逸氣凌秋旻雪度日邊棹
風吟江上蘋清詩落吳楚此地生陽春郢曲和者稀劍
歌不復陳歸來使酒氣酒酣氣益振青樓喚歌舞日見
羅衣新却笑相如宅淒涼四壁塵交歡徒結面肝膽向
誰陳因子寫遠意風期越江濱

答陳滄洲留別之作

海上春欲暮樓頭花滿林一樽風雨夕千古幽期心平
旦忽惆悵愴然惜離襟踟躕歌白雪留贈比黃金十日
不盡歡臨岐徒悲吟舉目望霄漢浮雲蔽重陰滄洲渺
何許春水洪濤深此別非萬里無時間徽音以我子猷
船期君安道琴毋為歎白髮歲晚重招尋

顧山齋分韻志別

孤雲與獨鶴千里悵悠悠時因長風吹雙落碧海頭鄭
侯念長違董子經時別幾望西南天孤吟嘯臺月昨日

放扁舟輟棹三江流中夜造我語片言解離憂逆興橫
素襟吐辭若流水揮杯對黃花兀然不知醉歡樂情未
極復此成分飛矯首秋風外徒驚蕙草稀

九月八日郭南山亭宴集分得下字

海國霜氣涼秋聲落遙野乾坤肅以清收納矚多暇出
郭尋幽期同人命軒駕載酒入翠微憑高憩層榭蒼山
橫黃雲大江天共瀉飛雨霞際晴夕陽雁邊下江山滿
陳迹今古成代謝千載同一時黃花笑盈把酣歌林壑

暝新月松蘿挂高興殊未平臨風獨悲咤

望廬山作

掛席度彭蠡停橈望匡廬蒼蒼五老峰秀出東南隅氣
勢掩衡霍崢嶸壓東吳千巖散秋色倒影澄江湖倏忽
霽飛雨瀑流掛香爐懸崖殘雪古澗落垂虹孤聳目萬
仞表茫茫飛鳥無飄然挹空翠心與浮雲俱我欲呼謫
仙結巢松已枯遲回徒仰止飛鷁上天衢

題邑生陳溢鍾山草堂

鍾山抱藍田水木含清氣愛爾靜者居草堂在山翠簾
櫳映竹開几席侵花置野客載酒過山僧抱琴至陶然
接歡賞邈爾成幽契月出天海空雲生石門閉岱溪樵
唱來沙頭松聲細佳趣足淹留遠心更迢遞維時屬休
明巖穴無遺棄終南登捷徑北山裂荷製予亦問山靈
斯人果忘世

賦得羅浮霜月懷鄭二逸人

海國梅始白飛霜動鳴鐘寒空一片月掛在羅浮峰夜

色不映水清光與之同
百里皆瑤華千林閉幽風
蕭條巖際葉嘹唳雲邊鴻
遠客起遙念滄波思千重
夢迴明鏡沒寂寞聞幽蛩

郭晦之歸宸峰群公相送至光嚴寺分得客字
化城負東郭地古嚴公宅
同佩結幽尋况值將歸客
山門坐翠微蘿逕入松柏
定水注行衣香雲繞離席
銜杯雙樹間百里見海色
日暮各分飛空山夜寥寂

題雲林書隱圖贈梅江許宗顯

愛爾江海居清風繼箕顓起予丘中賞逸興探靈境粉
墨含天光丹青藏雲影窗開象湖陰簾捲龍峰頂林靜
絃誦閒波空棹歌冷滄浪可洗心白鷗待孤艇

韋蘇州應物西郊燕集

原野穀雨霽熙陽麗芳辰良遊出西郭集我平生親野
酌藉芳草飛花落衣中時聞幽鳥哢復眺群山新睠此
不盡歡行當念徂春回心勿睽離願言保其真

題千里掀蓬圖効常建體

日沒川路濶松陰澄晚流掀篷卧天色超忽江潭秋渚
月鏡中淨孤輝漾輕舟心將空際雲身與波上鷗了視
無外物曠然神遠游予亦滄浪情從君問方洲

同羣公餞鄭五秀才至鼓山寺分題贈別賦得
臨滄亭

劣窮海上秀中峰開禪宮飛亭掛空翠直上臨方蓬溟
漲在几席天光映簾櫳目極萬里外但見清濛濛曙色
從東來晃然靈境空登臨豈不偉別意嘆無窮

賦得春草碧色送丘少尹歸四明

春色有佳興送君惜別情
帳前見芳草綠盡空江
潯千里靄晴翠夕陽烟際深
遙分白鷗水近映青楓林
萋萋滿行衣萋萋生別心
王孫行當歸蘼蕪思越吟

遠嶼堆藍

江晚波自濶天空諧遠尋
渚霞霽孤島綠映滄浪深
殘日鏡中沒餘暉在前林
黛雲結玄髮碧氣橫素襟
其以
卷畫山寄君無聲吟

秋江漁唱

大川饒數畧淺瀆無吞舟日暮收我綸唱歌度中流歌
長入空濶兩岼江聲秋斷續和鳴榔搖颺隨狎鷗曲終
人不見雲水空悠悠

贈友漁樵歌

我本漁樵者結交青雲人朱門華館不下士青山白屋
歸來貧聞君愛與漁樵友每逐漁樵在林藪兩屐松風
萬壑間孤舟蘿月雙溪口朝與漁者親暮與樵者隣山

厨東薪煮白石野飯折荷包紫鱗春風行歌出林曙落
日叩舷渡江渚負策閒隨黃鳥吟濯纓時對騷人語世
人結交徒結名黃金不多交不成羨君不交黃金貴却
友漁樵如弟兄

古咸陽行

長安古城盡禾黍故國荒涼變今古秦地山河滿夕陽
漢家宮闕隨塵土咸陽昔時何壯哉離宮複道飛空迴
五陵白日歌鐘起三輔紅塵車騎來一朝坐見繁華歇

冠蓋散為烟霧滅草木猶纏戰血腥丘墟尚帶行輪轍
年代悠悠經幾秋空餘渭水向東流回中古道無遊輦
關內何門尋故俠傷心此地不能道惆悵雄圖成蔓草
惟有終南萬仞青年年閱盡行人老

賦得吳航渡送趙少府之京

君不見吳航渡河上蕭蕭多古樹樹根積石長青苔應
是昔人繫舟處寂寞寒潮自往還關河北望空雲山天
浮百粵榮光歇海接三吳霸氣寒吳王城闕幾千載舸

艦何年到閩海危檣峻櫓逐飄風今日吳航名尚在江
上年年春草新城頭車馬往來頻野鳥不知驚候吏垂
楊空自送行人

題邊文進桃花雙禽圖

詞人工粉墨花底見雙禽青鳥飛來日瑤池春色深亂
紅看欲雨幽弄聽非琴莫到成蹊處金丸滿上林

題葉士謹石林精舍

開筵餘松菊藏書富簡編硯池春霽雨琴几晚涼天酒

伴呼浮白儒生問草玄
應耽名教地倚杖信流年

題華峰望日圖

飛步青蓮花聳身凌紫霞
天鷄弄海色西掛三峰斜
漱太陽精逍遙金母家長安
日下影回首望京華

賦得客中送客

在山每送客客行思未已
他鄉此別君離情滿天地
長空一飛雁落日千里至
故園未同歸寄君兩行淚

野渡橫舟

落帆逗前浦渡口喧已寂野艇橫淺流空江帶愁色漁
歸絕島遙鳥度羣山夕應有待潮人吟成山月白

牛路春耕

淺渚蒲葉長深村杏花吐東臯春事興盡室相隨去谷
鳥勸我歌青山澹吾慮日暮望柴關牛涔取歸路

龜湖晚釣

湖上夕水寒潛鱗避深釣野老本無營一竿掛殘照人
知白首心我愛滄浪調何必客星高將貽故人笑

寄陳五先輩

春山曾共賞一別又西風岐路非關遠心期恨不同暮
天孤嶂靜秋水夕陽空為有相思寄雲邊送斷鴻

晚春寄懷林八員外董七侍讀先有遊董巖之
期

黃鳥堪求侶青山獨掩扉相思空夜月一別換春衣江
樹雲邊出林花雨外稀董巖佳賞地連佩莫相違

夜泊官塘見新月

落日長川暝孤舟獨客愁若為今夜月不是故園秋片
影懸珠斗微光下玉鉤心期明鏡滿指日大刀頭

送許志學北遊

聞說幽并壯嚴冬雪作花長空無過雁念子獨辭家朔
月迎仙槎灤雲引客車薊門登覽處顚望憶京華

除夕

臘盡雪初晴春迴促漏聲孤燈親遠客一歲只殘更律
候青陽轉年隨白髮生迎新應待旦端佩謁承明

重送許子之巴西

雙鳬新被命萬里遠從官聞說巴山好何愁蜀道難峽
猿驚印綬蠻吏識衣冠聖德懷荒服賢勞莫憚煩

嶠嶼春潮

瀛洲見海色潮來如風雨初日照寒濤春聲在孤嶼飛
帆落鏡中望入桃花去

衡江夕露

大江白露下秋氣橫滄浪夜色不映水微風忽吹裳孤

每待明月時聞蘭杜香

松嶺樵歌

峻嶺饒朽木采之行且歌歌長白雲外遠與松聲和日
落望烟歸山風吹薜蘿

九日同鄭二逸人董七侍讀林一秀才雨中宴

集朱聘君碧潭軒以微雨潭上來分得微字
微霜昨夜塞鴻飛雨裏逢君未授衣華館把杯仙菊潤
青山對面故人稀泉飛百道溪聲遠風度重林酒氣微

明日相逢乘霽景登臨不用怨斜暉

送秀上人遠遊

一燈初別祖師禪孤月寒雲思渺然
飛錫却從紅日外浮杯還渡白鷗前
尋鐘野寺經殘雪乞食春城向暮天
我有采真秋興逸相期何處聽寒泉

寄林七膳部兼呈林懷之廣文

無諸臺下葉初黃客裏相逢值早霜
秋館醉看仙菊滿禪房坐識雨花香
別來塞雁江雲隔夢去青山海路長

白髮廣文憑問訊門前還有幾升堂

得鄭二宣海南手札

番禺天外古交州
念子南行戀舊遊
故國又經花落後
遠書翻寄雁來秋
梅邊野飯逢人少
海上青山對客愁
為報羅浮雲影道
早隨明月引歸舟

送雪峰僧龍淵歸三山

新持半偈出青蓮
孤鶴閒雲思渺然
金錫來承天漢語
紫衣歸坐雪峰禪
尋鐘野寺殘山外
漱齒寒流落照邊

行至東林休結社松枝已偃舊房前

江亭別

春江澹澹白鷗波一曲陽關為爾歌
莫向樽前惜沈醉
青山長在別離多

江上扁舟圖為林維德賦

扁舟一葉楚天寒
遠樹空江野照殘
憶得湘潭歸棹晚
千峰倒影鏡中看

題界畫臺閣

銅雀高樓借日懸
姑蘇舞榭入雲烟
繁華一落金屏影
半是吳山鄴水邊

題趙大年小景

獨卧荆扉拂曙開
啼鶯相喚故人來
落花昨夜迷行跡
先遣家僮掃石苔

題畫秋景

疎林遠岫帶烟霏
積水長天合翠微
何處寒聲隨落葉
一行新雁向南飛

題赤壁圖

赤壁江山幾度秋
畫圖仍見舊時遊
祇今惟有東山月
夜夜清光照客舟

題雪毬花

玉簇雲開雪作團
輕盈冷艷不勝寒
王孫蹴踘歸來晚
猶愛冰姿鏡裏看

題紅白蓮

素艷穠華似鬪開
露房雙啟暗香來
只疑月下瑤池會

半出紅粧捧玉杯

附林伯璟

春答友石山人見寄

朝理湖曲瓜夕灌沙園菊涼風吹衣巾落日在林谷適
枉修文者惠言比金玉古人不可見見此亦云足矧是
遺世儔功成身不辱孰致皎皎駒徒羨翩翩鵠

望月樓為永伯傑賦

獨夜上高樓越鄉見明月鶴髮映萱闥蛾眉安桂闕撫

景對蒼茫經時感飄忽淚欲衣線沾心將匣刀折潮平
螺渚空天遠雁峰絕倚閭知暮頻問寢念晨缺愛日日
難留瞻雲雲易滅但願蟾兔光長照桑榆末

賦得嚴陵灘送王生偁

瓊瀾錦湍鳴濺濺釣千羊裘即軒冕麒麟丘墟伯國秋
鵝鵲荒涼漢宮晚富春祠古雲霞新桐廬臺高日月隣
後人空有文辭弔過客時將蕉荔陳知子泊舟風雪裏
溯石緣沙弄清泚先生之名雖不同先生之心尚堪比

賦得滄浪磯送劉仲謙

古冶城西行二里大夢山前見湖水勢接危欄拍斷磯
直似滄浪烟景底藕花菱葉吹香時鷗鷖鵲來去飛
丹石凝雲作銅爛碧沙射日生瓊輝胡為同心不共賞
幾度相思成獨往花宮鐘鼓久寂寥梵宇樓臺但蒼莽
適君見我自六平報最又欲趨承明分携肯惜磯下醉
留別須題磯上名

為張文初題畫贈洽公

禪翁安禪不出山
畫史為畫山中閒
寒月高懸碧蘿幌
曉雲深護青松關
寶地樂聲聞澗底
梵天香氣識林端
定回幽壑猿叫斷
食邊絕巘鳥飛還
蓋頭把茆亦自好
棲身十笏何其煩
貫休能詩誇宇內
文暢得序傳人間
新圖摩挲重歎息
舊逕髣髴窮躋攀
聽師拂塵說善果
使我拂袖辭塵寰

林枝

題入定門

石門閉空翠中有釋子居藤蘿蔽白日化景人世殊真
僧坐何年膝下穿黃蘆劫灰幾輪變悟此因地初茫茫
圓鏡中一脫塵垢汚斯門尚可入余亦當結廬

清心橋晚坐

危橋臨清流水影逗寒石上有千仞松年深翳蘿薜杖
策諧幽尋吟嘯終日夕心與寒流清跡比浮雲寂即此
澹忘歸香風滿巾舄

凝霜樹

南山有嘉木翠影何離離東風麗晴旭秋月懸枯枝冷
然一夜霜曙色凝叅差恍疑雲錦張乍若霞彩施即茲
有瓊樹何必仙路奇

自鳴石

峩峩南山石逗影青雲連時來忽長鳴聲若雷霆喧崩
騰震林木隱隱落寒泉得非天鼓墜無乃仙樂懸物理
有如此使我心淒然

題葉仕晦後山亭

瀨溪一水清如玉兩岼蒹葭映寒綠白雲深處後山亭
四畔喬松覆修竹迎風八面窗櫺開蕭然一逕生莓苔
房櫳白日琴書靜詩酒長年嘉客來主人相對情何極
引麈談玄罄平昔似結山靈泉石盟豈伊朝市雲泥隔
天書昨夜徵巖扉束裝遠赴招賢期一官海邑香名徧
千里雲山轍跡稀三年蒞政多嘉績雲外飛鳧快雙翼
考最天官衣錦歸叙情鄉舊論心日時維秋暮天宇清
紛紛籬菊繁金英落霞孤鶩空中見水鳥風帆望處生

錦衣公子蟾宮客襟懷似與秋波溢抹月披風七步成
飛龍卧鳳揮毫得顧余性拙耽勝遊雄詞莫繼良可羞
茲辰共對尊前酒良朋美景空淹留主人不久歸南海
山中猿鶴遙相待後夜孤琴過草亭蘿月風泉重感慨
題葉仕晦岳水風帆圖

閩江之水清如苔奔流千里何壯哉故人此日之官去
東風一道聽帆開人言此水經年代地老天荒猶未改
離心似水日夜流帆影隨風兩相待沙頭載酒歌別離

人生得意今如斯化行海邑豚魚信澤及炎荒雨露滋
春風百草桑麻長多景樓臺日初上雞犬相聞六萬家
東南百粵通隣壤風帆去此莫躊躇父老殷勤望使車
中年不及聞三異好覓歸鴻為寄書

飛仙巖

高臺聳雲漢壁立何崔嵬昔年有仙人跨鶴茲山來殮
霞鍊金鼎九轉超凡胎空餘松下石積雨生莓苔

超凡臺

古臺翳高樹清輒浮埃松風度虛耳澗瀑聞飛雷恍
疑紫霞洞乍若登蓬萊仙人不可見使我空徘徊

禮星壇

古壇隱蘿薜歲久莓苔斑昔年有真人棲隱心自閒清
宵望斗極百拜資顏顏我欲從之遊脫履紅塵間

飛錫峰

上人棲遁者飛錫雲外峰去留渺莫測心與浮雲同潛
山幾千仞瞬息收奇功斯人不可作誰能繼其蹤

次三琅峰復林叔度見寄

獨向空山學採薇
青泉白石共忘機
晚風偏颭離人鬢
朝露還侵久客衣
巖下雲飛天外沒
雨前帆影望中迷
多君愛我情何厚
屢遣新詩寄落暉

琅峰掃松

酒滿清尊淚滿衣
巖花冉冉雨霏霏
空林日暮悲風急
惆悵孤魂怨獨歸

百年事業獨孤墳
松柏蕭蕭倚暮雲
落葉滿林回首處

哀猿啼鳥不堪聞

古平山居

一片空濛紫翠浮
氤氲曙色藹林丘
若非蓬島神仙宅
應是雲間白玉樓

又

拂拂霏霏藹暮天
遙看暝色翠微連
道人不作瑤池夢
祇戀青松白石緣

附趙廸詩

詠散木道人

世人尚松柏鬱鬱衆所竒
斯人有深意散木寧自期
顧茲枝葉茂感彼雨露滋
淹留枳棘藂棄置空山垂
工師弗我顧梁棟匪我思
寂寂青山下日暮涼風吹
所以古君子謙守常自持

竹軒

訟堂寂沈沈涼颼起修竹
愛戀此君心銘軒共幽獨
歲寒色不渝青青美如玉
內虛常自持外直竟無曲
朝泛

渭川晴夕對湘潭綠厭種河陽花羞同彭澤菊日與琅玕期清風聊自足

鱗次臺集宴送馬自牧歸館

盍簪陟崇臺憑高豁千里清樽屬離人年光若流水浩
浩江海心悠悠雲山意天空鳥影寒日落秋聲起對此
渺予懷懸情自茲始

賦得陶母墓送別

剪髮待佳賓陶氏有賢母孤塚依空山芳名亘千古野

卷三百一
花笑春風山鳥啼寒雨送君歸故鄉因之為延佇

白菜

家園曉萋萋露葉何青白長隨苜蓿盤不近膏粱客寫
入丹青中間情聊自適

諱曰

良辰更淒淒四顧慘不樂罄歎似有聞想像猶存若眷
彼膝下趨儀容宛如昨分飛迅如遺骨肉竟誰托茫茫
寓太虛沈沈隔冥漠終身痛莫伸五內崩猶割旨酒空

自陳九原何由作履此霜露晨寧不心如灼

擬崔顥長安道

長安道上春如綺朝來冠蓋奔流水誰人不畏霍家奴
甲第英雄連戚里望中車馬多如雲衛青新拜大將軍
腰間金印懸紫綬門前翠蓋擁朱輪將軍自是椒房寵
由來天幸承恩重侍獵長楊赤羽旗陪遊上苑黃金轡
道傍青青楊柳垂五陵年少多光輝蘭堦珠彈鳴珂去
柳市銀燈夜醉歸香塵百里花如霧乳燕雙雙春欲暮

來往惟聞歌吹聲行人識是長安路

王維桃花行

扁舟閒棹武陵曲落紅萬點春波綠乘興沿流去不窮
夾岸桃花奪人目山迴溪轉入漸深縈紆幾度隔雲林
遙看林下人家影近聽村前鷄犬聲恍然初入如人境
洞裏烟蘿白日靜蘭徑春深玉有烟綺窗畫永花如錦
驚聞客至復相呼爭迎置酒問何如初從避地潛來此
自後因家成久居苦遭羸氏行苛法竟携妻子塵寰別

山中猶着秦衣冠世上誰知晉年月世人那自見山青
青山一徑通仙靈遙連閬苑仙源杳不見長安戰血腥
歸來擬若攜家往祇今靈景知何向翠壁紅泉祇獨尋
芝草琅玕應難想萬壑千峰翠黛浮多情長憶別來愁
回首空山不可問惟見桃花逐水流

挽滄洲先生陳景明

昨夜德星天上掩山中聞說太丘亡可憐幽室重泉閉
無復滄洲嘉興長蕙帳雲昏猿鶴怨蘿衣秋冷澗泉傷

元龍雅望知何在康樂襟期迥不忘
青草更聞詩思逸碧山猶想屐痕香
未承鳩杖尊桓季忽聽商山沒綺黃
日永苔枝懸寶劍夜深寒笛起山陽
每懷載酒尋花徑空憶携琴過草堂

北邙行

北邙山下悲風急魂車磷磷男女泣
浮生富貴能幾何請君聽此薤露歌
居貧艱難葬獨苦在富光輝人送多
山前翁仲笑相語貴賤應湏土中去
新墳我我土猶濕

日暮狐狸作人立白楊蕭蕭人已歸
佇看墳前長荆棘
題山水人物

德星堂倚碧山隈喬木縈紆曲澗迴
蘿逕亂侵紅葉滿
松扉不掩白雲來深秋庭發黃金桂
積雨堦生碧玉苔
千嶂停雲修竹暝孤琴候月綺窗開
夜涼醉倚岩前瀑
香暗啗餘雪後梅谷口幽期時悵望
輞川佳興俱徘徊
溪聲夢入寒猿斷鳥影愁將夕磬催
佳句多情追沈謝
閒居有賦勝鄒枚珠林落景明窗戶
翠壁飛花入酒杯

泉石趣幽依枕席芝蘭香靄近樽罍鳥聲閒對雲間榻
林影青浮江上臺即此端居人境外更須何處問蓬萊

寄衣曲

製就寒衣誰與將長縫短線牽人腸寸絲極於寸心苦
借問傍人同寄與封裹頻開仍覆視一片慇懃心萬里
江南十月寒不禁況我良人在遼水天寒雨雪陰山道
去日行裝豈完好今將血泪與寒衣寄向天涯何日到

兵車行

兵車行征馬鳴路上行人皆哭聲哭聲徹天淚滿地天
地自是終無情弓箭在身刀在手父母相隨語未了妻
子牽衣在後啼兄弟束裝向前走遥遥西上咸陽路萬
里蒼茫起烟霧傾身迥逐孤雁飛鄉鄰親戚知何處掩
淚吞聲行負戈運糧斬木北防河軍中昨夜詔書至發
兵轉戍長城地野曠天清戰血腥悲笳日暮秋風起君
不聞長城夜哭秦時鬼瀚海風烟漢家壘秦漢爭雄幾
百年有血當時成海水武皇重開邊干戈苦未息婦人

力耕鋤丈夫事行役千村少烟火萬井惟荆棘兵革海
內猶未清州司門外徵求急君不見長城窟城下草根
纏白骨人生莫作長城卒

采蓮曲

采蓮歌歌采蓮鬢雲斜墮黃金蟬蘭橈畫舫清江曲珠
鈿羅裙凝雲綠葉翠花紅色如綺鴉黃粉白情如玉江
上休隨鴻雁飛花前莫並鴛鴦宿采蓮自小慣乘潮江
中風浪何飄搖共怨良人千里外顧影殘粧恨未消

王昭君歌

自顧傾城姿六宮人莫比薄倖丹青人使我恨至死忽
朝嫁我天一方託身萬里何茫茫宮月歌殘楊柳色梨
雲夢斷羅衣香玉容暝對邊塵泣昭陽恩寵何嗟及雲
邊箭落雁聲寒帳中霜重貂裘濕蕃王強妾若盡歡異
域不通言語難肝腸暗與絃俱斷獨抱琵琶向月彈

古薄命

妾命薄如秋葉葉薄從風勝如妾妾薄此身何所依葉

薄常赴風中飛妾薄命如秋影影瘦伶俜月中冷妾身
強在如影輕影輕猶得隨月行良人遠成交河北堂上
姑嫜髮應白鬢釵剪髮奉甘旨夜製寒衣寄萬里妾命
強存不如死妾命薄何太惡容華暗向菱花落

銅雀臺

高臺已凋殘歡愛從此畢不聞歌吹聲惟見楓葉赤春
風輦路依江渚鳴璫珮玉知何處舞影晴浮漳水雲歌
聲暝作西陵雨君不見英雄割據無復存全盛須臾那

可論春深芳草宮前碧淒淒猶帶羅裙色月明風冷總
帳空佳人掩泪望陵泣

古釵嘆

古釵埋沒知何日泥中拾得重愛惜兩股盤龍十二行
釵頭仍刻雙鳳凰鬼工金錯加雕飾古制無光土花蝕
莫嫌此樣不稱儀更是內家舊時物傳聞隣女爭來看
玉指摩挲復驚嘆慎勿棄置宜深藏留取花前作珍翫
題成趣軒

幽人荷衣蕙為帶幽居笑指秋山外碧水青山意自長
墨綬朱輪心不愛寧甘高卧絕華軒木葉紛紛獨閉門
籬落鳥鳴山火夕江村人語藤蘿昏瓜田藥圃歸來晚
月色蒼蒼隴猿斷列鼎無論浮世榮一樽長對清輝滿
林下相逢獨有君鹿門谷口俱無聞羨爾草堂慎終始
莫令山鬼空移文

塞下曲

朔北寒風起春來雪作花黃雲愁隴水白骨怨邊沙柳

暗邊塵暮營空塞日斜故園芳草綠客夢幾還家

宿鄭五別業林處士

不見催租吏漁歌聽自頻應迷輞川路空想武陵春落
日聞清磬寒林見故人秋風如有待江上共垂綸

客中除夕

牢落天涯夜人窮歲亦窮空山雙鬢白孤館一燈紅臘
盡屠蘇外春來爆竹中此身如斷梗何事苦匆匆

秋思

身世如萍梗他鄉總是愁
暝燈蟲入夜殘雨葉翻秋
坎止知何處睽離似勝遊
虛舟從所適無日是安流

題畫

孤亭臨水夕喬木生寒色
清隱自幽人宛若山陰客
群峰入戶青一澗當牕白
日暮獨凭欄衣上歸雲濕

感懷冬夜

窮冬天地閉積雪暗河關
身世隨孤雁家林隔萬山
江聲回積夢燈影對愁顏
遙夜心千里蕭蕭兩鬢斑

擬古王子安郊興

閒居春日賦清興故人同柳烟晴泣露蘋浦暗生風水
牽殘影綠花送斷香紅祇恐青山暮金樽綠酒空

別贈蔡茂

少年重豪俠長向五陵遊醉倚夷門日歌殘易水秋猿
聲烟外樹鴈影月邊樓未有蒼龍劍神光射斗牛

別龍川尉陳海

憶得從游日青袍各少年今來俱白首相對共悽然我

病秋山雨君行瘴海烟浮雲分散後明月幾時圓

除夕

奄忽時空度浮雲節序遷更殘猶舊歲明發是新年春
入屠蘇裏寒消爆竹前絕憐揚子宅華髮守青氈

挽李氏太母

七十人生少慈顏近百齡正宜樂壽考豈為掩泉扃客
弔山靈泣魂歸隴樹青輶車當祖載薤露若為聽

登餘干城

荒原落日過重城，萬里蒼茫感客情。
鄉思雨中和雁斷，秋風江上見人行。
楓林西入吳江遠，驛路東分楚水平。
遙望天涯流落久，暮雲飛葉自縱橫。

山居

我家曾住越山隈，喬木春深紫翠堆。
堂上佩聲朱履度，庭前山色玉屏開。
衣冠有恨先王後，家世應從南渡來。
文獻祇今三百載，清風白屋守蒿萊。

秋懷

霜滿楓林江上村犬聲籬落護柴門空山落日秋砧暝
野渡荒烟晚磬昏寂寂寒燈當永夜依依涼月對殘魂
羈懷淒切空垂淚又聽前溪起斷猿

孤雁

折羽驚弦下渚蒲分飛歸路失相呼哀鳴天際雲堪伴
寒影江頭月共孤北度關山鄉國迴南依湘水稻粱無
弟兄此日知何在望斷窮秋恨亦枯

咸陽懷古

鮑魚風起沙丘道五采文龍屬沛公玉斗碎殘謀士去
楚歌聲斷霸圖空東流渭水千年綠西望驪山三月紅
惟有五陵松柏在蒼蒼曾閱幾英雄

釣龍臺懷古

戍鼓城分散暮鴉無諸故壘到堪嗟青山猶記秦封域
芳草空餘越世家逐鹿旌旗雲漢杳釣龍臺榭夕陽斜
英雄牢落今千載風雨蕭蕭起暮笳

挽姬喬氏

紗窗落日度黃昏
知是音容隔九原
華屋不聞燈下語
粧臺空想鏡中魂
香羅猶染殘春泪
花運惟餘舊襪痕
獨有南宮詞客恨
多情何處向人論

送王孟揚之京

年來知己嘆飄零
誰唱離歌復忍聽
有恨空江芳草綠
多情落日故山青
雲間征騎頻催發
花外流觴祇暫停
祇恐分攜愁不極
臨風長醉莫教醒

別舍弟宗一

粵江江上思悠悠若上扁舟雙泪流去國身飄天外葉
還家夢斷海邊秋山從鳥影當空度雲傍猿聲入夜愁
遠道六千過桂嶺窮荒垂死豈堪投

送宮人入道

淨洗紅粧翠黛殘承恩却向太清壇羅襦已解明珠佩
寶髻新簪碧玉冠晝永閒依松下鶴春深猶夢鏡中鸞
碧雲涼月秋衾冷還似昭陽獨寢寒

錢塘懷古

龍飛鳳舞下錢塘冠蓋朱輪散異方王業偏安新典禮
山河無復舊封疆銅駝雨冷依芳草石獸雲昏卧夕陽
今古廢興多少恨一聲孤鴈海天長

奉和聖製從蓬萊向興慶閣道中留春望之作
陪遊禁苑早春前鶯囀春風入綺筵柳外翠華承日轉
花前閣道與天連管絃聲動千林曉草木晴浮萬井烟
自是宸遊多睿藻子雲偏得侍甘泉

過賈誼宅

故宅荒涼倚碧岑
寒雲漠漠跡難尋
書沈湘水情何極
鵬賦長沙怨已深
空館無人啼鳥到
閒門有逕碧苔侵
可憐前席今千載
惟有清猿自嘯吟

蘇臺至望亭驛人家盡空
悵然有作寄從弟紆
東吳黎庶獨何依
景物淒清舊日非
芳草園林人不見
落花門巷燕還飛
干戈時起風塵暮
烽堠春來戍火微
高卧東山猶未起
洞中花發憶茶薇

登鼓山

車從追遊到上方金宮鐘磬靄林塘彩雲寶地通霄迥
翠壑松濤入海長蘿逕引盃山鳥下石厨供饌澗泉香
空堂清梵沈沈夕共聽三生色相忘

題螺洲林公魯小景

茅屋松扉水畔村居人殊勝武陵原草深行逕迷歸路
花落春潮自到門石上暝琴期宿客林間微月動清猿
不知何處謝端宅淒絕空江螺女魂

西城夜月

西城有明月照彼崇臺上萬籟夜沈沈清光獨相向

小景

茅屋掩芳林蘿衣卧苔石空山寂無人寒雲落秋色

虛室絃聲

空齋寂無人絲桐奏流水飛絮落寒潭靜逐浮雲起

秋江漁唱

漁舟曉唱來聲度蘆花影月落曲未終江空釣絲冷

遠嶼堆藍

微茫江上峰青青雨中積幽人興無窮閉門對秋色

鷓鴣

朝浴湖水濱暮宿菰蒲裏偶值盪舟人雙雙復飛起

書鄭公啓扇

幽人愛青山結屋空林裏夜深夢白雲明月在溪水

題山水

幾家茅屋水邊村花落春潮夕到門溪上數峰青似染

居人說是武陵原

其二

江上千峰紫翠浮
松門苔徑映清流
茅堂雨絕湘簾暝
卧聽空山一夜秋

其三

九疑如黛暮雲間
帝子何年去不還
唯有清猿聽不盡
瀟瀟寒雨萬重山

其四

流水人家洞裏幽
清猿古木思悠悠
別家幾度藤蘿月

閒却瑤琴石上秋

晚眺

白雲深處野人家倚杖閒吟日未斜
江上數峰看欲盡晚鐘殘月入蘆花

送陳文叔分教融州

別來三載一相逢百越雲山意萬重
回鴈峰高霜月冷夢魂猶憶帝城鐘

客中元夕

花市銀燈夜向深
香風羅綺迥沈沈
不知何處笙歌起
傳得新愁上客心

伏枕

衰病龍鍾兩鬢華
荷衣弱體不勝加
空山遙夜人聲絕
一點殘燈落盡花

畫馬

塞上番兒控驢驢
豈知天既有乘黃
春風馳道花如錦
玉勒驕嘶出建章

題鄭介叔扇

谷口幽居迥不忘青山修竹舊書堂
別來十載林間月風落松花入夢香

送林漢孟之溫陵

年來知己各離群況是春深又別君
柳色青青芳草綠停杯淒絕一江雲

寄沈魯原

綠蘿潭島碧紛紛門掩青山獨卧雲
殘月空江清夢遠

令人長憶沈休文

壯在襁褓時不幸先人奄棄大兄尚幼荷慈母
鞠育之恩寬柔之誨至于成立命從師學宣德
乙卯濫竽科第幸叨微祿嘗痛念先人值時多
故投老林泉著作無有虛日惜夫舊稿塵存者十
僅一二壯不肖弗能光紹先志以亢厥宗焉敢沒
先人之所存敬錄諸體詩分為鳴秋前後集命工
壽梓置于家塾垂諸永久為我子孫珍藏而保愛

之時景泰五年歲次甲戌春三月朔旦孤子壯謹

識

林敏

塘上行

石髮明濯濯江蘼復田田
靡蕪獨何為零落朝露先
深塘會有涯別木仍有顛
條風江上行憂來悄無邊
羅衣怯素體齋沐况經年
嘗以蘭蕙心喻作金石堅
誰謂膠與漆中道成棄捐
不食蓮葍苦焉知萍實妍
不歎蒲柳

老翻疑雨露偏人影亂止水飛魂逐榆烟大堤回輦處
合沓生苔錢愁聞歌綠水往古皆共然

步虛詞

杳杳紫金闕飛薨集祥雲玉女擁龍旂執節推朱輪玄
元降綸音列坐諸天君瓊臺雨寶花仙衆何繽紛赤舄
跨青牛黃冠驟鶴羣冲虛奏鐃吹不許世人聞臣愚但
長跼垂紳訴哀勤秦皇欲不死服食空多門漢武鑄金
莖未能沃心焚勅賜太上符真詮秘其文假合作容貌

蟬蛻超埃氛瑤池洗毛髓彩翠仍氤氲五內洞靈曜三
葩吐奇芬芝草產玉田呼龍自耕耘忽而與天壤心影
無嶙峋雲霓為余駕虎豹向我蹲上見風雨跡下見天
地根凌風逝不返浩劫應長存

留別壺公山人

夙昔負靈異齋沐營丹砂經年竟無成乃知仙路賒為
文何足道說劍徒矜誇神情若飄風浮海思乘槎涵江
入雲水天影明蒹葭窮源杳莫測石瀨仍幾家月從壺

山出照見菖蒲花龍吟波上烟鳥散空中霞搖曳鳴吾
琴蕙心豁天葩夫子乃知音延之飯胡麻塵蹤未洗髓
爛熳遊天涯永懷靈境迴矯首長吁嗟

晦日稍次山谷

清溪殊險豁石瀨何淙淙尋源竟莫測又復上幾重行
處衆壑盡望中天影空於焉倏含景水木相玲瓏溫翠
翳中舄片雲起西峰忽忽洞深杳大圓變溟濛飛湍逗
日月急雨隨蛟龍洗心投白鳥息見期青松願因紫霞

秘永諧鸞鶴蹤

夢秋

狐狸泣海月簷隙分斜光陰風颯然來萬籟秋茫茫寒
聲吊落葉遠思悲雁行寂歷夢中語神魂亂飛揚雲根
秋水淨石上秋草長逡巡破陰翳白日升扶桑

曉發石竹山卧龍潭

飛軒窅洞碧溪口寒流深溪南一峰峻衆壑波上陰杉
松亂天影水月乃余心時節開竺書寂寂空中音雜花

逗秋思鳴瀑絃素琴願垂白鶴影永矣諧幽尋

清源洞作

松柏隘石門清溪垂亂花尋源望不極水上流胡麻衆
壑相崩奔一峰凌斷霞昔人煉骨處白石盤陽厓至今
風雨來猶疑下霓車冥心道經秘假寐紫皇家授以霹
靂文晤言營丹砂

晚次流沙河

湖口寒山蒼芳草猶未歇扁舟諧遠尋曠然向雲闕北

風蘆葦鳴白日波上沒其時鴻雁來擁棹蛟龍窟遂歌
滄浪清而乃濯玄髮風氣逗天影蘿雨澤人骨石上彈
玉琴清響在林樾到家興未已夢遶松際月

春日過高逸人別墅

此地有別墅投閒尋隱淪酌君樽中醪笑我衣上塵石
竹拂瑤席野荷清角巾雙松駐白日一水流青春盤石
憶李愿鑑湖懷李真古有逸民傳非君誰與論

江上送鄭山人

祖帳送離人，勞歌暮烟裏。
暝來江上宿，殘日照寒水。
清尊醉落花，孤棹依蘆葦。
雨翳燈影微，風蕙笛聲起。
後夜有相思，緘書寄雙鯉。

天王寺

珠宮隱上方，載酒一乘興。
雨歇瀑水涼，雲歸古松暝。
忘機野禽狎，發詠山鬼聽。
坐對月上時，空山響烟磬。

登宿雲臺得外字

香刹辭世氛，况同野人會。
寒巖結暝陰，古殿藏深翠。
目

賸遠空半興落飛鳥外日暮惜解攜相看嗒然喟

夏夜陪宗兄林八員外雙溪蘭若宴集得夜字
散帙棲鳥時幽尋憇精舍天吟風滿巾露飲月侵夜烟
篠澄遠心雲蘿翳長夏回看衆壑陰杳靄鐘聲罷

寄山中人王錫

埜服逢山客探玄輔嗣甥蘇門風外嘯盤谷醉中行候
館迷征雁春城過曉鶯佇看花落盡思爾豁吟情

題流紅圖

玉溝澄晚色金屋閉秋塵
鴛被辭君寵蛾眉妬妾身
披庭霜葉赤永巷露苔新
欲寫心中事含情祇自顰

懷宗兄林八左遷興業長史

南宮歸卧久興業左遷時
誰念連枝會翻為夢草思
鵲鵲霜霰急鴻雁信音遲
佐邑應多暇長吟謝朓詩

贈醫者

海上烟霞澗山中歲月淹
引泉陰澗迥採藥晚風恬
迹比韓康隱名將子訓兼
長安無二價猶是慕清廉

期宗人林大遊華藏海

巾舄行歌接梵筵偶來松下草芊芊也知只在秋雲裏
潭水溪花到處禪

題畫

三生石上舊烟蘿九曲閒雲倚醉過滿地松花仙夢覺
春聲都入榜人歌

江南意

露侵紅粉鏡臺斑眉黛含愁蹙遠山長在深閨那識路

秋來夢遶穆陵關

湘裙剪就茜裙新
愁裏風光病裏身
強整釵符隨女伴
隔簾教喚賣花人

吳海

遊郎官峰

連山如波濤高峰盪雲日
萃然孤杓聳其勢孰可匹
危攀將欲飛俯瞰覺自失
羅田幾聚落端坐見纖悉
南延川源深北望海水出
處高視益遠縮地豈有術
天寒霜

露交收穫事已畢仍年蝗旱餘民物盡蕭瑟邁茲得非
幸惆悵寧具述

遊七巖寺同行諸君子

羅田衆山中七巖獨高秀經營將半載宿願始得副緣
雲攀鳥道十步九飭飭剛飈從北來巖谷盡號噉促步
赴層巔依石避野燒鬱然烟焰交歛若雷電遠其勢吁
可畏僮僕盡驚走須臾得少息方覺性命有列坐咸自
慶啗齎酌大斗陰陽却變化霏雨垂白晝癡雲迷海嶼

昏霧失林藪歸途畏虎迹慘慘暝色厚幽懷莫能寫造
次宜自咎述此成短章聊用紀邂逅

夏日燕東臯亭

展席俯清池倚檻盼層巘苗綠滿平疇草秀被長坂風
度荷氣清日移樹陰轉長笑天為高汎觀心自遠良時
會豈易莫待歲華晚

石倉歷代詩選卷三百一

欽定四庫全書

石倉歷代詩選卷三百二

明 曹學佺 編

明詩初集二十二

王佐

應制賜宋承旨馬

聖明天子齊唐虞
四方混一同車書
大宛西域總臣附
萬馬入貢皆名駒
天閑十二森成列
牝牡驪黃色俱別

羅帕輕籠錦作韉絲韁穩鞚金為勒玉堂學士真老臣
日日趨朝侍紫宸承恩特賜飛黃馬騎出通衢不動塵
飛黃之精直天駟四足騰驤若星駛况拜親題御製詩
奎壁垂芒照人世須知君恩如海深臣騎黃馬當赤心
風雲會遇有如此彤筆宜書煥古今

唐仙方技圖

開元天子承平日錦繡山河壯京室金殿璇題表集賢
玉屏粉繪圖無逸夔龍接武居阿衡萬方旭日當文明

衡山老仙何所有亦復通籍承恩榮縞衣白髮酡顏老
自說時來致身早綵篋初開玉仗分白驪突出銀鞍小
榻前製號賜通玄始信人間別有天樓船未遣蓋珠賜
歲籥俄更天寶年九齡歸卧曲江上牛郎又入中書相
花雨香飄蘭若鐘柳雲春撲金鷄帳萬機日少樂事多
梨園法譜聲相和闕鷄舞馬看不足寧獨仙人逞白驪
仙人豈是呈仙技畫者傳之有深意延秋門外羽書飛
却駕青驪向西避青驪劍閣雨淋鈴一段閒愁尚不勝

豈道畫圖今若此碧雲芳樹滿昭陵

題桑直閣江山勝槩圖

我昔趨神京道出匡廬峰手持綠玉杖遍踏金芙蓉是
時秋高天氣肅最愛秋聲滿巖谷萬頃湖光帶白蘋九
疊屏風挂飛瀑結巢便欲栖雲間夔龍趨赴羣鷗鸞才
名用世果何有贏得歸來雙鬢斑至今夢想煙霞趣擬
托毫黷寫情素君家此圖誰所摸似我當時舊游處遠
山縹緲如游龍好處盡在煙嵐中晴波落日曳澄練枯

林老葉鳴秋風屠蘓高下林間起水色山光畫圖裏軟
紅無路到柴扉空翠常時撲書几中流放棹知何人錦
袍坐岸方烏巾若非高潔魯連子應是風流賀季真我
生垂老願未酬魯人詎識東家丘圖中勝概倘易致便
從此地營菟裘

戊戌客南雄

寂寞江城晚依依獨立時迴風低鴈鶩返照散旌旗家
在無人問愁來只自知幾回揮涕淚忍誦北征詩

憶舍弟彥常

庭草秋仍綠江楓晚漸稀
年光隨水去功業與心違
達海猶傳箭殊方未授衣
翩翩南去鴈故作一行飛

和元正見寄

早歲承書問草萊
忽將懷抱向人開
秋霜荊棘關頭墓
寒雨鉤輞海上臺
鬚鬢已從青鏡改
夢魂曾逐片帆回
天涯一掬思親淚
待灑瀧阡萬樹梅

酬孫典籍仲衍見寄

憶昨交游日
罄懽清時曾擬共彈冠
春風草檄將軍幙
夜月聯詩羽客壇
江海只今來遠信
雲霄無復望飛翰
惟應賸釀陶尊酒
遲爾歸來共歲寒

發龍灣別王惟吉張廷彥

日日搞毫紀玉音
敢期清夢到山林
賈生對策曾前席
疏傳歸來更賜金
日月行瞻丹闕迴
煙霞歸去草堂深
相看已是康衢叟
擊壤無忘報國心

舟次匡廬寄同朝諸公

翰墨同時侍禁闈恩榮寧謂及寒微舍人舊掌絲綸誥
御史新裁錦繡衣天上鵷鷺還接武江邊鷗鷺已忘機
他時行部如相覓秋水蘆花是釣磯

午日呈鄭久誠參政

百頃芙蓉罨畫船賀家湖上水平天金盤送果沈冰碗
羅扇題詩散舞筵往事氛埃成遠夢佳辰風雨憶華年
澗蒲九節根如玉服食于今笑學仙

題李谷清雪景

梁園飛雪玉繽紛
坐列金貂酒半醺
借問當時誰授簡
相如詞賦最凌雲

百馬圖

蹄影參差踏軟紅
曾觀萬馬擁飛龍
旌旗不動金笳歇
一片川原錦繡中

竹枝詞

竹林塘西越女歸
雙雙采蓮歌夕暉
蘭舟蕩槳忽分去
兩岸風花高下飛

美人紅葉圖

謝家夫人詠柳絮黃陵女兒歌竹枝誰信長門秋澹澹
西風黃葉斷腸詞

附趙介詩

長門宮

翠華朝望迥長門夕思孤螢流金殿暝露下玉階蕪昔
作鳴陽鳳今為繞樹烏愁顏空似玉咳唾不成珠寶鏡
塵將滅羅裳色漸枯淚將寒漏水夜夜滴空壺

步虛詞

采采清露英皎潔玉不如元和合真一飲之極甘腴自
然生羽翼何用登雲車迢迢河漢上瓊臺曠清虛未從
衆仙去天風搖佩琚

寓山家留壁

有客來何方駕言自華胥囊中無一物手把太極書象
罔為我御鴻濛為我徒朝觀赤城標夕弄滄海珠去來
了無碍所憩即安居青山出屋上修竹當坐隅好鳥時

一鳴景寂心亦虛泛泛巫峽舟迢迢大行車人心自高
下于我良晏如

懷仙吟題玉樞紀卷後

我昔采藥羅浮顛仙人招我遊諸天天門洞開三十六
琳宮貝闕相連延瑤臺百丈空中起玉女燒香月明裏
天王宴坐擁羣真環佩珊珊滿人耳中有一人號雷師
龐眉皓首拜玉墀奏云侍從五千劫未聞至論窮玄機
天王含笑揮玉拂舉首向空如畫一羣真意領寂不宣

但見琪花散空碧我時目覩心欣然萬物得一天何言
乃知至道本無物豈有文字人間傳人間所見皆幻影
欲吸晨霞駐清景須臾月落仙馭旋蘂闕瑤臺風露冷
回看閭闔不可攀白雲與我留山間倚劍長歌一壺酒
龍吟萬壑松聲寒

南樓對月

夜上南樓看月色水晶簾捲銀河碧水輪倒射滄波寒
對此清光是何夕舉酒邀月真吾儔夜長不用秉燭遊

萬里涼風滿襟袖
洞庭七澤涵清秋
秋聲冷拂珊瑚樹
湘娥鼓瑟鮫人語
試吹玉管遏行雲
曲中髣髴霓裳舞
霓裳舞罷迴明璫
北斗已挂西山傍
但願清樽長對月
今人古人何足傷

瑤池

宴罷瑤池暮
雨紅碧桃花落
幾番風重來
八駿無消息
擬逐青鸞入漢宮

趙臨清入五先生集跋

太祖平定華夏歸馬放牛聿興文教維時海內文人
學士彬彬輩出自江以南尤沾被聖教之先吳下則
有四傑閩有十才子廣則有五先生皆一時詩人之
選也四傑集十才子集吳閩皆有刻或傳寫之者五
先生詩選廣有舊刻歲久朽落僅人家有藏本而亦
弗全嘉靖丁巳督府談公大叅王公咸興詩教求五
先生集於太史泰泉黃公處僅得黃李孫王而失其
一乃以汪右丞集並刻藩署足五先生數云迨甲子

歲余承乏至廣得觀是集而私訝焉右丞固淮人也
不當列于廣况先生之稱乃後進目其先哲之辭右
丞帥廣于五先生有統攝之分不當與鄉大夫伍而
並先生之稱耳雖疑之而未獲其人與集乙丑夏少
叅峒峰曹公乃于梁中舍家得其祖父文康公家藏
舊本乃知黃李孫王之外而有趙臨清者携其本以
授余余喜其疑之得釋命工刻之以補五先生之闕
而以汪右丞詩別自為集竊怪趙臨清之詩刻厲奇

崛何以失傳豈以孫王黃李皆列于縉紳而趙布衣
士歟然盛唐時有王孟高岑四作者孟蓋亦布衣也
何嫌于並稱况志稱臨清性狷不喜接貴官達士勸
李韡毋應薦即其志固輕軒冕而土苴其官爵也視
浩然不才明主棄之句猶有不見用之怨其人品固
甚懸絕得不為廣之高士乎高士而先生固宜又或
以其詩僅五六篇而欲遺之則趙嘏以倚樓一句稱
鄭谷以鷓鴣一篇名詩之可傳詎在多乎哉嘉靖乙

丑五月朔閩人閻憲陳暹謹識

石倉歷代詩選卷三百二

欽定四庫全書

石倉歷代詩選卷三百三

明 曹學佺 編

明詩初集二十三

黃哲

臨高臺

臨高臺高臺百仞凌雲開丹霞曙色明九垓咸陽王氣
何佳哉交疏結綺紛崔嵬虹橋複道雲中來直過南山

表雙闕遙連北極正三階宛轉朱欄臨渭水蜚廉觀閣
通天起銅龍高拱日華鮮青雀翩翩月明裏鳴璫搖佩
溢層城錦幄芙蓉翡翠屏寶鼎香酥調玉食金莖瑞露
屑瑤英瑤英玉食知難老鸞鏡青蛾爲誰好君王八駿
上瑤池日暮長門怨芳草年年換物華瑤池歌管
醉流霞皆傳阿母桃成實又獻安期棗似瓜蟠桃碩棗
真堪羨方朔詆諧侍懽晏題詩爭擬柏梁新求仙豈意
桑田變願得層臺更萬重崑崙西望接崆峒能共赤松

鞭彩鳳仍隨軒后駕蒼龍顧視萋萋茂陵道惟餘隴樹
生秋風

戰城南

君不聞陰山敕勒川番兒飲馬來翩翩狼頭大纛三萬
落彎弧注樂雄燕然烏桓古道黃沙塞青塚荒原白骨
田漢將鷹揚遙度磧戎兵獸駭復窺邊烽火照甘泉
殿殺氣浮空白如練右地連營夜合圍左賢鳴鏑朝馳
戰聞道嫖姚新築城先令都護出奇兵三門八陳互纏

繞萬衆一心同死生偏裨轉鬪血凝肘箭鋒流星餓鴟
吼卷甲遙塞大校旗橫戈怒落單于首愁雲慘日殊糝
糊敗馬號鳴霜草枯金裘寶玦青珊瑚闕氏花顏泣路
隅含悲掩袂辭穹廬彫盤跪進紫駝酥軍中椎牛日高
會蒲萄寒香濃不醉振旅先論衛霍功封侯未數金章
貴封侯意氣本雄豪誰識沙場汗馬勞惟有城南征戰
地髑髏京觀長蓬蒿

白苧詞

長洲宮中花月輝彩雲夜傍瓊樓飛吳姬娉婷白苧衣
揚蘭拂蕙春風歸花籌傳觴注紅玉月鏡當筵掩明燭
低環按節宮調促嫣然一轉亂心曲長夜酒多歡未足
驚烏啼向東苑樹星河闌干正當戶明眸皓齒歌白苧
蛾眉嬋娟花月妬含情奉君君莫顧雲中璧月易盈虧
葉底穠華多盛衰願為寶階千歲石長近君王雙履綦

雉朝飛

野田無人蒿草薄羣雉斑斑草中落五月禾熟桐風清

南陂北陂聲喔喔東方漸高晨露晞金翎繡項爭光輝
桑畦如霧行不見雄鳴挾雌驚復飛渴飲幽澗泉饑啄
野田粟羣雛來哺聲粥粥寧向郊原抱耿介不羨雲霄
競高逐魯恭慈仁桑陰自馴鰥乳竊傷憤牧米薪下防
虞羅上畏鵬鶚朶頤垂涎羣動交虐聖人祝網天網疎
八紘山澤無畋漁蓬機艾戈無爾圖朝出陌上飛暮還
蒿下居翼衆雛兮行且呼飲而啄兮寧爾軀雛兮雛兮
樂何如慎勿變化陳倉為怪誣

烏棲曲

九月過姑蘓江頭霜草枯西風吹葉盡愁殺夜棲烏棲
烏月明裏霜重驚還起無處托安巢啞啞渡江水江波
淺復深東去無還心白苧吳宮曲能成哀怨音只言懽
樂長相保青春幾時秋又老可憐西子斷腸花不及虞
姬美人草舞罷垂楊金縷衣椒房絳燭明星稀越騎爭
馳山海動吳歌尚繞梁塵飛梁塵飛飛白苧哀烏啼夜
半閭門開鷓鴣夷浮江麋鹿來月明猶照姑蘓臺

自君之出矣

自君之出矣無處托鱗音思君如畫燭淚盡不明心

初入書閣呈董宗文博士兼簡同舍諸公

河關歇王氣淮南擅英靈天眷廸皇運人謀歸聖能石
城雄虎踞鍾阜宛龍騰紫署弘東閣青門踐北陵來王
玉帛至訪道蒲輪徵髦英起幽谷俊乂羅明庭變豹蔚
華彩非熊聞作興朝儀制述美錫賚恩庥承前席思賈
誼橫經推戴憑奚為繞枝鵲亦企圖南鵬芸軒靈簡輯

蘭署駕班升高策屢懷董名流知慕膺追陪虎禁人被
遇龍門登仍慙匠石顧用匪輿輪勝母云棄樗朽庶以
從規繩

十月二十二日四望山陪祀禮成呈諸執事

玄明開朔序裡類卜辰良武成遵誓命汾時備馨香惟
皇儼雍穆對越思洋洋凝旒仰坤墮授律挾乾綱風雲
從龍虎樂舞登鳳凰珪幣有容秩綏纓紛煥煌苾芬既
明誠盼嚮迴穹蒼茲焉迪昌運赤伏臻遐祥徂征乃自

葛義旅時鷹揚同德奮熊羆桓桓先啟行阿衡重麾鉞
跪轍觀旂常海岱仍率職堪輿希泰康繁祠陋哀典昭
告紀興王羣英聿來助委佩錡珣璜多儀動文彩列宿開
榮光庸繭忝趨承賡歌聆頌章宸猷願終述豁達垂無
疆

過梁昭明太子墓

帝子降南浦飄飄蒼桂陰神飈迴震闕玄跡閔坤岑鳳
陵輝璞蘊龍沼媚珠沈文藻絢華黻芳芬揚素襟遺編

軼正雅曠代馳徽音玉馬風雲變金鳧歲月深霜蘭秋
被坂烟蘿夕翳林采蘋思永薦捐玦遂幽尋靈脩忽爾
逝歲晏勞予心遼東鶴馭遠緱嶺鸞笙吟眇眇因懷昔
營營徒慨今瑤華竟衰歇惆悵雍門琴

送道士蔣玉壺還茅山

華陽初慕道羽服依巖際辟穀咽晨霞朝元結真氣朗
吟扶桑頌伏謁三茅氏却駕雲中龍來遊人間世談玄
蒞珠闕稽首張樂地調笑芙蓉笙聲飄鳳凰吹僕愧金

門彥時聞玉笙倡方忻蘭苑晤忽念荷衣逝欲和瑤臺
章幡然紫烟閉石室縈翠芝丹丘藹松桂望望勞予心
猶懷碧山契

東平謁堯祠

初政禮羣秩晨趨鄆陰郭稽古詢道源放勲久徂落齊
宮委華枕黼辰銷丹堊庭榛雖雉升裳薜宗彞剝惟馨
思可薦廢墮予猶忤緬言垂衣時東狩茲方岳儀像儼
欽明聲容被綿邈茅茨遵曩儉堦堦傳舊朔遺澤紛在

斯今皇仰先覺亦播康衢謠紹爾雍熙樂

曲阜里謁廟

解組辭郛郭驅車循魯垆前登闕里近端仰素王靈猗
蘭遺芳潔神檜鬱蔥青時化洽千祀奎光浮四溟多儀
殷廟享斯文傳壁經几筵猶設席容秩儼充庭所念迷
途者空瞻明德馨困蒙今獲吝幽悱未遑寧靡靡寒水
至塗塗朝露凝迤回馳驅意夙夜思儀刑

洪範祠龍池禱雨獲應會隱士劉文正暨邑中

羣彥

齊沐戒徒御星言趨絳壇屬茲愆陽序霄祀罄衷丹龍
湫宵深閤神物時蜿蟺馨潔始云薦靈祈紛可干沛然
感敷施霖霖濟多難浙浙在林峴冥冥被岡巖焦原幸
沾濡庶類同忻懽鳴鶴集穹室翔鱗躍紋瀾郊垌悅童
耄庠塾慶衣冠所協詠歸趣方希民俗安賡歌誦雲漢
玄化奚能殫

弔陳思王

鄴都雄盛日英才妙七賢夫君照乘珠五色麗且鮮西
園倡華藻東洛賦嬋娟游鸞翔朝旭芳蕖映碧漣始協
棣華美寧虞箕豆煎桐圭空錫社銀海閉陰泉白楊翳
荆榛狐兔穴其阡喟然蕪山嘆肯企淮南僊

贈劉宗弼司業赴浙西僉事

晨頒錦花誥夕歛絳紗帷聊當持憲節詎是解逢衣於
越山水秀吳江鱸鰕肥移舟發白下搖旆出江畿川寒
葭葦靜天清鴻鴈飛勿念離羣速承明應復歸

秋夜雜興呈涂典籤韻

璿杓運西宇華月麗中樞坐知流序易瑤夜秋風生銀
漢呈宵景金堂含夕情柔條棲湛露嘉蕙茁幽莖撫迹
遂成感如何君遠征相思雲陽浦岌嶷限玉京鏡鸞停
趙舞箏鳳歇秦聲寸心渺何極搖蕩如懸旌

擬古

魯連天下士夙蘊匡世才却敵愧論賞英聲騰九垓燕
昭市駿骨樂毅趨風來虎戰躍中野名成真壯哉僕本

江海人西登鳳凰臺感此千古意長吟屢興哀朝經夷
門市夕醉高陽杯揮戈拂倒影義輪為之迴寶匣絢青
蓮龍文拭輕埃神光夜揮霍按舞何嫌猜騰驤為君舉
願掃浮雲開

簡涂叔良朱仲雅二博士

貞士多苦節考槃依澗陲叢蘭佩芳潔悅懌遂幽期至
德無終逸明揚膺盛時茲焉華東閣俊乂相追隨列宿
呈光彩翔飈清羽儀皇謨敷禹訓風雅泛周詩幸俾纖

蒙器叨承陪絳帷何因永斯好介爾崇明禧

舟次靈洲候廊雄飛使回不至

湛露晨未晞秋華被原隰征途夙已戒承命履遐邑桂
水寒悠悠揚帆望不及川鱗想同泳羈羽尚云戢維楫
乖素期臨流重於邑睠然沮溺耦詎洒揚朱泣惆悵芳
菲情日暮空佇立

秋月篇

金商鳴素節瑤律屆先秋始見西陵月嬋娟滄海頭清

規臨夜滿澄影際天浮媚浦沈珠迴凝波淨練妝常懸
鵲署初照鳳凰丘碧落宵同映銀潢曉共流梁園生
綺夢陳榭感芳憂爽洽征人袂光含思婦樓玉臺情未
已驚鑑影空留詎惜盈虧屢仍知晦朔周關山隨別騎
淇水送行舟願逐餘輝去蘭臺奉夕遊

與伯貞或華二友會

二妙聯英標睠言顧榛莽良晤諧夙心玄談慰幽愴江
蘼澹新綠谷鶯聞遠響感此離索情浩蕩烟霞想夷白

抗浮雲臨清延素賞何因繼芳躅一丘同偃仰

題蒲澗讀書處

編茅臨巨壑伐木憩幽巖携琴初涉澗投冊靜窺潭麗
澤方求益知人諧所耽靈芬遙可挹淵物坐能探野鶴
閒朝誦霜猿聆夜談董悒涼結蕙管榻淨霏嵐予志在
山水宜從雲外參

秋日懷友

雲館秋氣涼前楹新雨歇涼飈振清籟炎景韜餘烈時

菊有芳華露棠飄絳葉慨此搖落情於焉謬司業端憂
鬢髮變和俗性靈竭貞履期可堅玄言詎當接渺渺睇
川梁日暮方舟涉

分韻得也字贈林生瑛充貢

冰霜戒玄律遊子發中野筵几惜離羣壘樽企傾寫庭
柯覆喧鳥場藿維征馬錫貢擬璆琳光輝孰云舍文淵
穆典與壁水觀儒雅扳鱗爾所之附驥吾哀也滔滔歲
華晚積雪晨飛洒行矣慎毋淹長懷問津者

餞區伯寬領歸善邑教

橫塘候秋色芳蕖颯已變渺渺波上舟忽如翔風燕琴
觴激幽思籩豆徒有踐所念同襟者飄飄各鄉縣章逢
協冲素况復斯文彥此邦多奇勝名山蔚蔥蒨暄壑棲
雲霞寒松閱霜霰爾行問津處沮溺因可見

贈劉仁仲昆季還浙東

沈憂自多緒復此送歸人昨夜淮南雨不知芳樹春
來持別酒相與慰茲晨日暮行艫渺東南瀾越津

遊泰山

今年初出承明班折腰從政青徐間神州二月雨新霽
我來萬里觀名山名山泰岱連雲上鄒嶧徂徕鬱相望
晨霞彷彿見丹崖旭日瞳矐射青嶂羽服逍遙山際行
垂蘿磐石漸迴縈喬木千章寒谷秀陰泉百道曉虹明
玄都太古瑤階在石室丹爐長不改中林迢遞躡天門
五色芙蓉耀光彩東極羣真鳴珮環招搖玉女開金闕
蒼龍飛去溟海濶黃鶴下唳清風還奎壁祥光生縹渺

日觀扶桑擘昏曉登臨今日九州同顧視寧論萬山小
名嶽齊天天下知齋宮虔潔閔靈祇寶鼎椒蘭騰馥郁
芝楹華蓋仰歲華祠官祝釐朝擊鼓玉童吹笙雙鳳舞
魯禘秦祀變浮雲后土精靈夜相語功成世世來登封
明堂駿奔朝岱宗翠華行處入歸鳥樛木盡亞隨飛龍
微茫玉簡無人識綠壇陰洞秋聲急但聞松喬遺素書
我欲因之蛻凡骨絕頂玄芝應再生神遊早顧拋塵纓
笑騎蒼兕驂太乙稽首銀臺超上清

河渾渾洪武辛亥夏河決作

河渾渾發崑崙渡沙磧經中原噴薄砥柱排龍門環嵩
絕華熊虎奔君不聞漢家博望初尋源揚旌遠涉西塞
垣窮探幽討事奇絕云是天津銀潢之所接蔥嶺三時
積雪消流沙萬派從東決東州沃壤徐豫之墟懷山襄
陵赤子為魚夕沒鉅野朝涵孟諸茫茫下邑皆涂汙民
不粒食鄉無廬桑畦忽變葭葦澤麥壠盡化黿鼉居官
中聖人方旰食羣公夙夜憂曠職星郎又來博望槎西

去盟津求禹迹始聞古道行千艘一朝勢轉纔容舳舻奔
衝條忽駭神怪淺不浮漚泥沒篙我上梁山望曹濮長
歎滄桑變陵谷萬人舉鍤功莫施猶擬宣防再興築宣
防漢武威曷若堯無為洪波閱九載端拱垂裳衣玄圭
錫夏后安得辭胼胝龍門一疏鑿亘古功巍巍巍巍功
可成河水渾復清

奉和聖製鍾山禱雨獲應

天蒼蒼運乾剛雨暘時若民乃康孰令燠旱憂吾王九

土如焚嗟亢陽天津欲竭陰虹藏王心靡寧時惻傷桑
林罪已德進湯齋宮對越騰馨香真宰默應徵休祥靈
祇率職妖魑攘先驅靈霍舞商羊天瓢一舉敷四方甘
霖信宿仍汪洋勾龍后土占歲穰黍稷報功王道昌百
辟慶忭懽聲揚小臣頌述歌虞唐四序順成民弗殃魏
巍端拱垂衣裳天蒼蒼德德無疆

行路難為洪都義士揚安賦

粵客慕遠遊東來訪仙洲扶桑弄赤日簸蕩神鰲丘天

吳變現橫蛟虬狂瀾欲濟無輕舟我心西悲安可極九
疑回望丹山色斑竹荒祠暮雨深湘靈淚盡湘江碧直
欲排雲窺九關長風蕭蕭去不還鼓刀擊筑行路難相
逢楊子傾心肝此公平生負奇氣對我高談論經濟宮
中聖人急徵賢君材磊落終難棄平生耻作侯門賓聲
華滿座驚陳遵黃金結交重然諾白首相知忘故新予
亦高陽舊徒侶憐君跼蹐隨風塵知君愛君心獨親相
逢正值秦淮春秦淮茫茫春水綠春風撲缸春酒熟登

樓一醉成悲歌起舞龍泉悄終曲君不聞神鷹來脫鞵
上絛搏呼夢刷秋空高馬能委翅隨斥鷃喧啾俛啄棲
蓬蒿又不聞留侯五世誇相韓徇節忘軀西入關功成
乃慕赤松去富貴浮雲非所干爾有萬古心時來亦如
此魯連欲奚為欲蹈東海水行路難難可量海水尚可
濟身名須自強願為黃鶴雲中翔凌風振翮超八荒

寓治穀城寄京華親友

金陵別時春已半含桃吹花鶯語亂羣公送客勞勞亭

王事驅馳不敢緩折腰從政真可憐貂裘欲敝寒無氊
青徐古道暗荆棘二月黃河水塞川戰場蔓草縈白骨
城都蕭條狐兔窟柳塞胡笳夕厭聞花門突騎時還出
獵火荒涼夜合圍聊城關外羽書飛將軍轉戰畧邢魏
歷下遊兵分道歸瘡痍未復更顛蹶忍者呻吟日流血
朝耕暮戰同死生撫字無才政多拙有時登高望遠山
浮雲萬里何當還令人却憶魯連子一箭成名東海間

費將軍凱還歌

費侯佐國文且武禮樂從容在軍旅漢家卿相誰得如
雲臺功臣祭征虜王師轉戰下山東大將平燕無限功
復有奇兵專節制將軍同日度居庸居庸城邊草初白
邊兵夜遁龍沙北長風吹沙鐵山黑賢王琱弓控不得
組練如霜未倒戈狼烽斥候通灤河將軍洗兵河上波
馬前雙吹金唢囉英雄如公信無敵據鞍歸來親草檄
歸來更唱平邊歌燕然山頭堪勒石忽憶去年駐阿城
僕忝徵官曾送迎馬頭北去掃燕土今日傳聞朝玉京

旌麾再入阿亭路橫梁賦詩肯相顧官橋一道野棠開
人道當時列營處東風二月江南春露布先傳到紫宸
丹書鐵券分茅土願爾功成過古人

醉歌行為廊復初雄飛昆仲賦

昨日風雨中我來自西山不知春早暮花落長林間林
間幽人心事閒相逢一笑開雲關問我別來春幾度五
見飛花滿行路黃橙丹荔繞池栽清水離離照芳樹登
高酌我黃金壘傾情寫意無嫌猜携觴復就花下飲鳥

咏餘花鋪綠苔我惜落花君莫掃乘興即來坐芳草江
山如此多閱人與君相期恨不早君家伯仲多材雄白
眉更是人中龍東山還着謝公屐百世行藏安得同爾
曹曾辭鶴書召予亦蹉跎走荒嶠華髮盈簪已自慚烏
巾折角從人笑悠悠行路心惟君可知音南冠發楚奏
拂拭瑤華琴商聲淒淒夜沈沈酒酣風悲月出林終然
苦調不可聽為君更賦還山吟他年訪我桃花洞洞口
花殘春正深

王彥舉聽雨軒

輞川給事才且奇自我相親童冠時高談甚愛風雨夕
世上閒愁都不知幾回共酌東軒裏正值蕭蕭滿人耳
當窗滌筆寫黃庭涼聲散落鷺池水竹外淋漓芳砌寒
簷端飛洒落花殘先生擲筆向予笑如此宮商真可懼
況復交游盡文雅傾倒對之情不舍銀觥夜酌涼蒲萄
琵琶嘈嘈急如瀉先生醉坐銀燭低行雲入簾花氣迷
喈喈屋角聞朝雞出門只見花成泥當時雄筆誰更好

公孫狂歌君絕倒橫眠三日醉復醒夢見池塘生春草
一別淒涼十二年關河風雨隔幽軒懷鄉淚逐燈花落
隱几晴忘春溜喧君入蓬萊獻三賦我踐泥塗走中路
歸來相見頭總白坐上逢人半新故西窗舊話誰與傳
思君昨日空迴船綠蓑青蒨重來訪莫厭連床終夜眠

題招鶴軒

憶昔南游窺洞度醉騎孤鶴橫蒼冥千年雲夢掌中小
一點君山湖上青翱翔更入瀟湘浦湘靈彈瑟鶴為舞

清風雙翅若乘軒令我歸心厭塵土翻然獨下崑崙臺
鶴飛却望遼天回武昌樓前招不得惟見白雲天際來
朱君華軒號招鶴金莖可飲芝可啄臨臯羽客再相期
為爾長鳴返廖廓

分題賦羅浮山贈何景先百戶

吾聞名山洞天神僊之窟宅高高去天不盈尺上披浮
雲橫斗牛下瞰滄溟奠鰲極雲關五城十二樓老僊燒
丹居上頭鸞笙縹緲塵世隔羽服逍遙蒼澗幽山中夜

浮龍虎氣石室猶藏蕊珠祕瑤草靈苗幾度春玉泉香
蕊三千歲還丹九轉報功成手把芙蓉朝太清蓬萊弱
水方舟度閬苑崑崙飛蓋迎我昔懷山恣長往桃華古
洞遺幽賞鐵橋千仞意都迷絕頂玄芝日應長麒麟公
子出仙臺絳節遙從天上来車馬光輝到蓬華相看一
笑無嫌猜投我素書皆鳥跡浩蕩烟霞寫胸臆終然歸
旆九霄長但見冥鴻矯雙翼中郎詞藻絕人寰已進宸
卿最上班須公為寫觀梅興寄與江南驛使還

將進酒贈彭生秉德

華燈照廣席錦瑟彈朱絲一彈再三歎進酒卿莫辭大
夫成名垂不朽彭生早試穿楊手彩鳳朝鳴崗上桐驪
駒莫繫門前柳門前柳條冬尚青城南桂漿翻玉瓶觥
船滿引百分勸出門不顧蓬中螢君不聞洛陽賈生對
宣室長安九衢皆動色長安九衢橫九天爾如神駒當
自力我昔侍從金門中誓師牧野初成功功成治定四
海同條牧再見承平風爾行決科期第一狐裘蒙茸髮

如漆莫辭更畫金屈卮直上排雲振雙翮

短歌行與藍山陳彥中

桂水秋風高扁舟過蘋末西來佳公子袖拂湟川月公
子芳年狐白裘抱琴來訪丹山丘雲邊舉手笑相揖凌
雲意氣橫清秋高談雅論傾四座自言曾到燕山遊雪
中射虎隨飛將原上呼鷹從列侯酒酣馳向城南獵騰
身飛鞚輕一瞥赤手獲得千年狐路人縱觀誇勇捷卿
家嚴君誰得如湘南昔日專城居將門有將今復見見

此滄波明月珠明珠白壁相照耀知音更學絲桐妙傳
得吳儂子夜歌彈為楚客陽春調爾有吳越思言之使
我迷罷琴惆悵孤月落哀猿老樹臨雙溪他年同泛山
陰雪聽爾琴中烏夜啼

扶溪春望

溪頭望春春色深美人不見勞予心綠波渺渺向南浦
罨畫樓臺芳樹陰天涯滿目丹青障春日春花兩搖漾
翡翠蘭苕不可思駕鴛桂樹長相望相望相思雲路遙

金塘流水亂春潮
採菱風急桂舟晚
疑是當年楊子橋
橋邊楊柳青青好
惆悵春心被花惱
浦口迴船欲訪君
相思一夜蘼蕪老

寄道士蕭止菴

昔寓朱明洞
神遊碧澗阿
庭臨棲鶴樹
衣拂掛猿蘿
鳳吹青雲曲
龍琴白雪歌
仍慙勾漏令
塵夢入槐柯

又

頗棄人間事
來參內景篇
借騎緌嶺鶴
相訪大羅仙
稽

首傳丹訣長歌入紫烟
瑤花不着處同掃石床眠

贈陳憲使還嘉興

衡臯理輕轍華筵餞遠人
潮生碧海曙雨歇紅亭春
適越遂辭祿還吳思問津
超然不可企遙睇東山雲

楊氏湛碧軒

桂浦含秋氣蘿軒澹夕陰
鷺窺明鏡徹雲度彩屏深
宴坐消塵慮遐觀恣賞心
羣賢思歷下吟嘯屬芳音

送邵李二巡簡赴京

驛樹殘朝雨汀潮急暝流旌麾從此別尊酒慰離憂虎
石經銜箭龍門擬共舟蟾溪他夜月思爾玉京遊

贈白守中之湖廣

王孫芳草綠離思滿西州桂醑秦淮夕蘭橈江漢秋名
藩今所重形勝昔無儔元規賓從美吟嘯在南樓

詩僧杞上人得旨歸鄱陽葬親二十二韻

白下春容減紅亭麗日升暫邀芸閣彥相送草堂僧
轂同文會旃檀異德稱詩名隨處滿華幄自天承久被

宸衷眷仍推講座登離宮頻召對前席譽材能尚食供
蒲饌禪宗問葛藤龍河朝洗鉢鹿苑夜傳燈般若翻神
貝袈裟出御繒抽毫聯百詠揮麈竟三乘淨洒銀河水
清涵玉井冰虛空常湛湛行住獨兢兢陟屺懷芝朥瞻
雲別蔣陵綸音旌孝德珍翰誅先塋寸草慈輝映雙林
瑞露凝逍遙無俗慮攀餞有佳朋祖帳瓊花墮皇京寶
樹層江流梧浩渺巖戶錫飛騰綺散烟霞動珠含水月
澄虎溪從惠遠牛渚待袁宏莫厭塵緣混終知雅頌興

澹湖吟賞遍來就鶴書徵

遊黃陂五十韻

吾郡山川秀黃陂亦有名
聞君談勝槩邀我共遊行
路指蒼崖近村臨碧澗
縈塵囂辭瀕洞丘壑願經營
繚繞芟塘曲潺湲水碓清
深泥緣狹徑積雨漲前阬
披陟衣裳濕扶藹杖屨輕
陽雲迷靉靄歆石履崢嶸
俗訝精靈異誰知唱和情
林僧來問訊野老亦逢迎
注腕金芽茗充庖玉笋羹
敲推籬犬吠餽餉草鷄烹
少憩沾微醉前

趨若有程土門斜束隘坡岸敞連坪石馬眠荒壠昭陵
失廢塋騰蛟雙踴躍蹲豹互狎獍迢遞峰巒起穹窿窟
竇鳴嶺廡超險峻潭鮪漾澄泓灑灑泉分潔欣欣草並
榮奔流寒漱玉磐石迴疑城避地傷前事窮途感遠征
蟻柯塵業誤魚木禍羅嬰歲月重登覽煙霞幾變更陳
雷今合契黃綺舊同聲招隱依松桂尋芳拾杜蘅逍遙
吟伐木談笑坐班荆鳳澗歲蕤合螺峰宛轉明田家深
處樂王政此時平雜沓歡樵採喧闐羨偶耕豐年饒芋

栗膏壤足秣杭鼓腹雍熙叟居巢太古氓幽懷真可豁
佳境實難并白鶴鳴相狎青猿戲不驚靜中無俗念方
外有賢英蕙結靈均珮松號子晉笙仰窺懸瀑淨側度
小橋橫茅舍藤穿牖柴窗竹覆楹花簷風陣陣桐巷鳥
嚶嚶席帽省雲坐匏尊倚樹傾涼颶驅溽暑斜照弄新
晴枕石延詩思臨流破宿醒踈慵聊翰墨沈湎愧餅罌
着屐隨康樂回車泣步兵祇應除世鞅端可脫塵纓趨
走煩童御狎狂托弟兄橘中期四友林下憶三生絕德

飄須棄忘形席任爭玄言超混沌遐舉問蓬瀛瑶草行
堪掇丹砂煉欲成他年求道侶即此締幽盟

贄相國李公善長

吾君神武定中朝丞相勲名冠百僚漢室興王推鄧禹
唐宗開國任房喬江淮草木知名舊吳越山川闢地遙
好向龍樓扶赤日便觀麟閣近璇霄

呈張昶參政

絲綸閣下五雲飄政事堂中八座超班馬文章傳舊學

變龍勲業慶新朝宮花露重金莖賜衢柳風清玉珮搖
江海微生叨近侍也隨丹鳳舞簫韶

呈汪朝宗叅議

龍飛江表仗能臣虎變淮陽有俊人幃幄春風勤夙夜
藩垣南寄息風塵聞雞屢促鳴珂入倚馬仍看草檄頻
越客狂名叨薦啟無因東閣拜平津

北捷應制

王師幾日定秦郵詔發奇兵出壽州橫海樓船通楚甸

羽林旌節渡淮流胡笳慘動關山月戎帳威傳草木秋
聞道鷹揚能奮迅思歸燕將莫夷猶

送董文啟之江夏宰

委珮晨省拜玉除西游真食武昌魚王孫碧草秋無際
仙掌金莖露下初今日才名須卓茂當年詞賦說相如
登臨若對南樓月待爾賓鴻寄尺書

贈王深之官永康

賞心亭下玉壺傾客裏難堪送客情沙際綠蕪朝雨淨

天涯江樹晚雲平
扁舟剡水因乘興
高策河汾舊有名
勿謂微官淹驥足
金華涼月對秋清

正月初四日南郊禮成

午夜祥雲繞太微
聖明開運六龍飛
簫韶享帝聲容麗
玉帛來王厯數歸
寶幄天光臨負宸
金輿春色映垂衣
儒臣幸覩唐虞際
三祝堯年仰曙輝

謁黃石公廟

榆徑深深一草堂
松階寂寂半斜陽
青山遠近分齊魯

黃石英靈閔漢唐碑斷螭龍荆棘暗壇空鸞鶴檜槐蒼
鄉人更說傳書意故國風雲人渺茫

舟泊龍灣寄孫仲衍

吳檣楚柂十年間又渡秦淮虎豹關眼底故人成寂寞
夢中塵業負高閑九州風雨東南會七澤波濤日夜還
江上思君雲路杳掀篷秋對蔣陵山

贈洸口于巡簡

東郡于公最有名為儒曾事魯諸生鶴書三聘雲間下

龍劍雙飛海上行
明月畫船依桂浦
碧山紅樹繞花營
齊中舊客今誰在
青眼相逢萬里情

喜故人孫仲衍歸

十年東去入皇都
詞賦爭誇楚大夫
踈散已辭金馬籍
佯狂須覓步兵厨
花開上苑啼鸚鵡
草綠南園泣鷓鴣
惟愛碧山吟卷在
夜隨明月照蓬壺

贈戴雲

十年慣聽京華雪
忽憶閒雞夢覺時
萬戶曉鐘金氣急

九重仙仗珮聲遲
湟州柱樹誰招隱
庾嶺梅花有所思
一曲陽春知寡和
郎官清勝浩然詩

青宮哀詞

懿文皇太子也

前星光隕太微間
雲闕龍歸不可攀
慘結玄雲迷海嶽
淚揮寒雨遍戎蠻
清都鶴駕翱翔遠
緱嶺鸞笙縹緲還
遙想皇情哀慟處
萬年松栢紫金山

次韻仲衍巫峽秋懷

白帝孤城蜀漢間
錦江秋色隔巴山
霜清灩澦瑤瑤動

雨散陽臺翫翠環
王事歸心俱未已
世情岐路總相關
扁舟莫繫楓林下
卧聽寒猿一夜還

從軍行贈費指揮

英雄海左費將軍
淮海吳門舊策勲
又領貔貅三百萬
誓清沙漠報明君

又

聞說沙場漸倒戈
受降城北是灤河
雛姬窈窕隨征馬
美酒蒲萄載駱駝

秋夜雜興

金風瑟瑟吹明河
鎖窗時見流螢過
誰家玉笛生離怨
知是吳儂子夜歌

又

秦淮橋下江水清
鳳凰臺前霜月明
莫愁艇子繫何處
楊柳蕭蕭無限情

折楊柳枝詞戲贈朱文昭

綠陰馳道繞隋宮
拂雨撩煙送晚風
萬樹千條都折盡

不堪回首盡橋東

遊洪範池與劉文正

洞門斜日照金潭
千尺藤蘿掛石龕
騎馬獨來高處望
滿山松柏似江南

小塘山居

壁月斜窗夜氣清
禪棲無夢客燈明
山中萬籟俱岑寂
惟有松聲答磬聲

王孫挾彈圖

樂遊原上競繁華，騎出天南白鼻騮。
宮錦不愁清露濕，五陵松柏絢朝霞。

又

馳道香莎剪翠茵，金鞭閑颺落花塵。
溫泉樹晚歌鍾起，人識開元富貴春。

寄復初景翔諸友


寒泉疎竹映清秋，曾記仙人太乙舟。
今日逢君同感慨，不堪清淚洒西州。

又

荔枝原頭春水深多情得似玉郎心
琵琶撥盡涼州曲
石竹花殘風滿林

題野塘景

花落春塘急暝流湖光山色未銷憂
雙雙白鳥忽飛去
撩亂文鴛不自由



石倉歷代詩選卷三百三